



真情派

天時，總算無恁熱咁！碧君姊一出學校門，就遽遽騎等厥老奧多拜去到臺中个街路，安心買好一盒萋萋个「派」，正煞煞騎到交流道臂去赴車。坐上巴士，好得無麼个人，該盒點心還有一個位仔好坐，放在俚窗門个位仔、冷氣空摺佢調整到堵好。「去到中壢，無定著還涼涼當堵好食！」碧君姊掌等該盒點心，自家緊想來安自家个心。

壞咧，日頭晟入來咁！遽遽，窗簾同佢拉起來。手伸到盒仔面感受一下，啊哦，空氣略略仔燒灼燒灼呢，仰結煞正好？擎一本貢貢个書摺佢遮等？用右手放勢拈摺佢撥涼？先換位仔！佢遽遽企起來、摺位仔拍涼來，又細心細意摺該盒點心放正，正用自家个背囊摺佢遮擎日頭，這下，日頭晒佢毋著哩！

在中壢下車，還愛過轉一轉客運，等車个時節好得有電線樁好遮日，碧君姊像細人仔樣仔囡在電線樁後背、背跂跂仔遮擎日頭，主要還係愛守顧好該盒點心。等一下仔，研究所个同學就做得食著這臺中有名个點心咁。

「三八！中壢就有賣！」看等該對臺中旅行上來，完好、無一息仔推著个草莓派，吾心肝頭分人掙一下，嘴還係當壞在該笑話人。

「係，係啊，頭下盤車个時節佢有看著。唉唷，佢仰會知？」雖然四十零歲咁，碧君姊就像係佢教个小學生共樣，嘴翹翹、頭犁犁仔，目珠瞞啊瞞仔看等佢兜講。

「碧君姊唷，日頭一來就當緊張！摸燒摸冷，還遽遽摺佢換位仔，像係渡細人仔樣仔。佢坐在後背都有看著！」在苗栗上車个欣潔，見證該位守顧一個「派」个婦人家。

看等該埕靚到像花籃仔樣仔个派面項該粒草莓，想起頭擺在阿公个山園尋著刺波仔个時節，大家講个「愛呵過正好食」。佢兩隻手承起該埕「派」，毋使呵過、淨用目珠摺佢記錄：一粒萋萋个草莓睡在貢貢幼幼个乳油面、乳油底下夾等一層潤潤个紅豆心，承等佢兜个係一埕摺實个餅皮。該埕點心無黨無派，乜毋係愛還麼儕人情，就單淨係一埕珍惜同學緣同學情个「真情派」！

作者：彭瑞珠

☆詞彙學習☆

【派】pai：文首指「西式餡餅」，文末為「派別」。

【掙】dui`：扯。

【刺波仔】cii po' e`：刺莓、野草莓。

【燒灼燒灼】seu' ho~ seu' ho~：微熱的樣子。

☆文法學習☆

【V 動詞+好……，正……】ho`……， zang……：V 動詞+好(表動作完成)……，才……。

例1：佢揸好細人仔睡目，正去赴大夜班。(他哄小孩睡著，才趕去上大夜班。)

例2：若字寫好，正做得去搞哦。(你的作業寫完，才可以去玩喔。)